



Saltar fa buna luna e slucca la membra.




Hocus pocus – l'emprova generala ei gartegiada.

# Vacanzas tiel circus Balloni

A Sedrun han 36 affons astgau fuffergnar tiel circus ed esser ils stars ella manescha

DA SUSI ROTHMUND / ANR

■ A caschun dall'emprova generala dil circus Balloni a Sedrun sentev'ins il venderdis suentermezdi la tensiun da 36 buobs e buobas che havevan battacor, fagevan eglis grondes e pudevan strusch seser ina minuta ruasseivla-mein silla sutga. Durant ina jamna han els empriu dil team da Balloni da schonglar, far striegn, sesluittar ella rolla dil clown e bia auter. Igl applaus dil publicum che ha visitau las duas presentaziuns dalla sera ei staus beinmeritaus. Las tendas melnas-cotschnas dil circus Balloni crodan en egl ed ein enconuschentas en biars vitgs e marcau dalla Svizra. Avon 23 onns ha Pepe, alias *Lucas Cadonau*, giu l'idea da far circus cun carstgauns e per carstgauns. Ord quell'idea ei in variont e creativ circus pign sesvilupaus – in circus che vul svegliar e tener allerta la febra da circus. Cu il circus Balloni ha entschiet a porscher jamnas da project per animaziun da circus per scolas, scolettas, uniuns ed organizaziuns fuvan tals concepts aunc nunenconuschents. Ussa ei la concurrenza pli gronda mo Lucas Cado-



nau vul tuttina cuntinuar ed il success dat raschun ad el. Daferton s'engascha l'entira famiglia Cadonau pil circus, sia dunna *Dagmar* ed ils fegls *Nicolas* e *Gian* lavuran, respectivamein fan emprendisadi, el menaschi da famiglia. Vacanzas passentan ils Cadonaus – che habiteschan (cu els ein buca sin turnea) a Sirnach el cantun Turgovia – dapi biars onns a Tschamut. «Cheu plai ei a mi, perquei hai jeu viliu vegnir cul circus a Sedrun», ha Pepe declarau. Igl onn vargau ei il circus Balloni staus l'emprema ga sila piazza da scola a Sedrun. La jamna vargada ein els puspei vegni a Sedrun e 36 affons dalla scola primara ein selegrai da ferdar l'aria da circus. La gronda part dils affons ch'ei semidai en pigns artists habitescha a Sedrun ni Mustér, enzacons a Glion ed ils auters ein hosps da vacanzas che han profitau da quella purschida speciala. Els han anflau novs amitgs, empriu da sefidar in da l'auter, da surmontar temas e bia auter.

### In job tiel Circus

Sper ils nov artists ed animaturs da circus che lavuran tier Balloni engascha Luca Cadonau durant las vacanzas da scola gidonters. Gjuvens ni giuvnas che segidan durant las jamnas da project. Igl onn vargau eran duas amitgas stadas a mirar la producziun finala a Sedrun ed ein stadas fascinadas. Perquei hagien ellas dumandau Pepe, sch'ei detti era jamnas da circus per scolaris pli vegls. «Na, gliez purschin nus buc, mo vus saveis vegnir en piazza l'auter onn», hagi quel rispundiu

ed ellas hagien immediat dau tier. Aschia han las giuvnas Tuatschinas – *Adriana Deplazes* (14) e *Laura Pfister* (14) – giu la quida da far in'experientscha extraordinaria sco gidontas da circus. La jamna vargada ha mintgina dad ellas giu quietau d'ina gruppa e cun agid d'in menader dil circus han ellas trenau culs affons ina ni era pliras numras da circus. Durant ch'jeu tschontschel cullas mattas vegnan ils pigns e vulan saver quei e tschei dad ellas – ins vesa ch'ei han bugen *Adriana* e *Laura*. «Igl ei ina biala lavur, ils affons han bunas manieras e fan quei ch'ins di», lauda *Adriana* sia gruppa da 15 affons e conceda ch'ella vegni ualti stauncla tochen la sera. Era sia amitga *Laura* fa compliments a ses dudisch pigns artists che emprendien e capeschien spert. Stregn vegni ei encunter sera cu ei possien buca pli: «Lu hai jeu stuiu sevilar ina ga ni l'autra.» Sper las numras da circus han las giuvnas empriu da luvrar cun affons e quei plai ad ellas. *Laura* ha aunc empriu zatgei auter: «Jeu sai ussa tgei che spetga mei ora ella veta cun affons – also dudisch less jeu segir buc», sincerescha ella riend. *Chanel* da Segnas vegn neutier e raquenta da sia numra d'acrobatica ch'ella ha trenau cun *Adriana* e *Pepe* e ch'ella vegni l'auter onn puspei en vacanzas tiel circus. Era *Nicola* da Sedrun less turnar in auter onn. El ha empriu da schonglar e far striegn e manegia che quei seigi stau tuttina flot sco dad ir en vacanzas sper la mar. *Anna* e *Mattia* ein schizun vegni si da Glion per far circus. Cun sia fantastica mimica ei *Anna* stada il clown perfetg.



Sco profis pendan las buobas vid il trapez.



Ils fakirs han surmontau lur temas.



Ad *Adriana Deplazes* e *Laura Pfister* plai lur job da vacanzas tiel circus.



Cul menaschi dils clowns ha il publicum pudiu rir da cor.



Als pigns striuns ein ils trics gartegiadi bein.



Las tscheras dils schongladers tradeschan co els ston seconcentrar.



Durant ina jamna ha la piazza da scola a Sedrun s'udiu al circus Balloni.

FOTSO S. ROTHMUND